

JESUSEN BIHOTZ GUZTIZ SANTUA

Jai Nagusia

B urtean

Sarrera-oharra

Ondo etorri, senideok, Jesusen Bihotzaren jai honetako Liturgiara. Maite-maite gaitula Jainkoak ospatuko dogu, eta guk egin geiken gauzarik handiena maitatzea dala. Zein beharrezko dogun maitasuna gure egunetarako!

Murgildu gaitez, ba, Jesusen bihotzean, Jainkoaren maitasunaz ase-betez, geure inguruan isurteko.

Abestia

Izan zaitez beti, Jesus maitea,
gure bihotzaren Jaun ta Jaubea.

Jesusen bihotza dago suturik,
maitasuna agertzen alde guztitik.

Non aurkituko da bihotz gogorrik
bihotz honen suan urtuko ez danik.

Abadearen agurra

† Aitaren eta Semearen eta Espiritu Santuaren izenean.

—Amen.

† Maitasunetik sortua izanik, maitasunean bizi izatera deitzen gaituan Jauna izan bedi zuekin.

—Eta zure espirituarekin.

Damu-otoitza

Maitasunaz berba asko eta abesti asko entzuten dogu egunotan; baina zalantzak daukaguz guztia ete dan maitasuna. Hartu daigun babes Jainkoaren errukian berak sutu gaizan.

—Jesus Jauna, Jainkoaren maitasunean bizi izan zinana, *erruki, Jauna.*

—Jesus Jauna, Jainkoaren maitasuna isurten deuskuzuna, *Kristo, erruki.*

—Jesus Jauna, alkar maitatzeko agindua emon deuskuzuna, *erruki, Jauna.*

(*Aintza*)

† Aintza zeruetan Jaungoikoari.

—Aintza zuri, Jauna, ta eskerrak zuri.

OTOITZA

Jainko ahalguztiduna,
zure Seme maitearen Bihotza gorestean,
maitasunez gure alde gauzatu dozuzan egintzak
pozik ospatzen doguz; egizu,
hartu daigula zeruko iturri horri gainezka darion grazia.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi da-eta gizaldi eta gizaldietan.

Lehenengo Irakurgaiari sarrerea (Os 11, 1. 3-4. 8c-9)

Jainkoagandik debekua eta zigorra baino ez jatorkuzala
uste dogunok entzun daiguzan Oseas profetaren berbok:
zelango samurtasuna iragarten deuskuen!

I. IRAKURGAIA

Ikaraz jartzen jat bihotza.

Oseasen Profezia liburutik

Honan berba egiten dau Jaunak:
«Israel ume zala, maite izan neban;
eta Egiptotik dei egin neutsan neure semeari.
Neuk erakutsi neutsan oinez ibiltzen Efraimi,
besoetan eroan neban;
halan be, ez ziran ohartu Neuk nituala zaintzen.
Amodio-lokarriz erakartzen nebazan, maitasun-loturaz:
umetxua aurpegiraino jasotzen dauana lez nintzan
hareentzat;
makurtu eta jaten emoten neutsen.
Ikaraz jartzen jat bihotza, dardaraz erraiak.
Ez deusat hasarreari bizten itziko;
ez dot Efraim barriro hondatuko,

Jainkoa naz-eta Ni, ez gizakia,
santua Ni zuen artean,
eta ez nator hasarre-suminez».

Jaunak esana.

Erantzun salmoari sarrerea (/s 12, 2. 3 eta 4bcd. 5-6 (R/. 3))

Ugaritasuna iragarten daben hitz eta irudiz goralduko dogu Jainkoa, bere maitasunagaitik, salmo honen bidez.

Erantzun salmoa



R/. **Atarako dozue ura pozik
salbamenaren iturrietatik.**

V/. Bai, Jainkoa dot salbatzaile!
Badot uste on eta ez naz bildur,
Jauna dot-eta indar eta kemen,
bera neure salbazino. R/.

V/. Atarako dozue ura pozik
salbazinoaren iturrietatik.
«Eskerrak Jaunari, dei egin haren izenari,
iragarri haren egintzak herriei,
aldarrikatu zein bikaina dan haren izena. R/.

V/. Kanta Jaunari, bikain jokatu dau-eta,
jakin begie honen barri mundu osoan.
Egin poz-irrintzi eta oihu, Siongo bizilagunok,
handikiro dihardu-eta zuen alde Israelgo Santuak».

R/.

Bigarren irakurgaiari sarrerea (Ef 3, 8-12. 14-19)

Jainkoa ezagutzeko era bakarra maitatzea dala dinosku Paulok, eta horixe da bere ikasleentzat Jainkoari eskatzen deitsona.

II. IRAKURGAIA

*Ezagutuko dozue
jakintza guztien gainetik dagoan Kristoren maitasuna.*

San Paulo Apostoluak Efesoarrei egindako epistolatik

Senideok: Niri, fededun guztien artean txikiena nazan honi, dohai hau emon deust Jainkoak: Kristoren neurribako aberastasuna jentilei iragartzea, eta guztiei argi adierazotea zelan diharduan betetzen, Jainkoagan, gauza guztien egileagan, betidanik gordeta egoan asmo ezkutua. Holan, agirian jartzen jake orain, Eleizearen bitartez, zeruetako aginte eta ahalmenei Jainkoaren era askotako jakituria, Berak betidanik eban, eta Kristo Jesus gure Jaunagan burutu dauan asmoaren jakituria. Kristori esker eta beronengan dogun sinismenaren bitartez ausartzen gara konfiantza osoz Jainkoagana hurreratzen.

Horregaitik, belauniko jartzen naz Aitaren aurrean, bai zeruan eta bai lurrian familia guztien sorburu danaren aurrean, eta hau eskatzen deitsat: bere aintzaren aberastasunari dagokionez, sendotu zagiezala bere Espirituaren indarrez, barrutik bizi zaitezen; bizi dadila Kristo zuen bihotzean sinismenagaitik eta izan dadila maitasuna zuen bizitzaren erro eta oinarri. Holan ulertu ahal izango dozue, fededun guztiekin batera, zein zabal eta luze, zein garai eta sakon dan Kristoren maitasuna; ezagutuko dozue jakintza guztien gainetik dagoan maitasun hori, eta, holan, Jainkoaren betetasunaz beteko zarie.

Jaunak esana.

Aleluia

1 Jn 4, 10b

V/. Jainkoak gu maite izan gaitu,
eta bere Semea
gure pekatuen parkamen-oparitzat bialdu dau. R/.

Ebanjelioari sarrerea (Jn 19, 31-37)

Bere bizitzan zehar dana emon ebanak oindino baeukan zer emon, eta hori saihetsa lantzaz zulatuz atarako deutsoe; garbitu eta bizi-barritu gaiezala ur-odolok. Zutunik, Aleluia abestu daigun.

EBANJELIOA

*Saihetsa zulatu eutson,
eta odolak eta urak urten eben.*

✠ Jesu Kristoren Ebanjelioa San Joanen liburutik

Pazko-jairako prestaketa-eguna zan, eta judeguk ez eben gura zapatuan gorpuak kurutzean gelditzerik, ze, zapatu ha oso jaiegun handia zan. Horregaitik, kurutzeratuei berna-hazurrak apurtu eta handik kentzeko eskatu eutsoen Pilatori. Joan ziran, bada, gudariak eta berna-hazurrak hausi eutsiezan Jesusegaz kurutzean jositako biei; baina, Jesusengana heldu ziranean, ordurako hilda egoala ikusirik, ez eutsoen berna-hazurrik hausi, ezpada ze, gudari batek lantzaz saihetsa zulatu eutson, eta bat-batean odolak eta urak urten eben.

Ikusi ebanak berak autortzen dau eta egiazkoa da haren autormena. Harek badaki egia dinoana, zuok be sinistu dagizuen. Liburu Santuak dinoana bete zedin gertatu zan hau: «Ez deutsoe hazurrik hausiko». Eta beste pasarte baten haxe dino: «Zulatu ebenari begiratuko deutsoe».

Jaunak esana.

HOMILIA

JAINKO HERRIAREN OTOITZA (Eskariak)

Jainkoaren debekua eta zigorra somatzen dogunok, zabaldu daigun barrua haren maitasun samurrera, eta eskatu:

—Eleizearen alde: gizaki guztiek aurkitu daien leku haren altzoan, batez ere baztertuek, ezereztuek eta inon ere lekurik aurkitzen ez dabenek, *eskatzen deusugu, Jauna*.

ZEUGAN DOGU USTE ONA

—Gure gizarteak baztertzen dituen ezindu, gaixo, zahar eta sufritzen diharduen beste guztiek leku izan daien gure bihotzean, *eskatzen deusugu, Jauna*.

— Agintarien eta ahaltsuen alde: diru-gosetik barik behartsuak kontuan izatetik bizi izan daitezcan, gizarte hobe bat eraikiz horrela, *eskatzen deusugu, Jauna*.

—Eukaristiaren mahaia inguratzen dogunok Jainkoak maite gaitula geure egintzetan iragarri daigun, alkarte egiten ahaleginduz, *eskatzen deusugu, Jauna*.

Hirutasunean alkar maitasuna iragarten deuskuzun Jainkoa: isuri eiguzuz Jesusen bihotzetiko ur-odolak, garbitu eta bizi-barritu gaiezan. Jesu Kristo gure Jaun berberaren bitartez.

—Amen.

OPARIEN GAINEKOA

Begitu, Jauna, zeure Semearen Bihotzeko maitasun neurribakoari;
egizu, gure eskeintza hau atsegingarri izan dadila
Zuretzat
eta lortu deigula guri pekatu guztien parkamena.
Jesu Kristo gure Jaunaren bitartez.

PREFAZIOA

Jauna zuekin

Eta zure espirituarekin

Gora bihotzak.
Eskerrak Jaungoiko gure Jaunari.

Jaunagan daukaguz
Egoki da eta zuzen.

Egoki da, bai, eta zuzen, bidezko eta salbagarri,
nonahi eta beti guk Zuri eskerrak emotea,
Jauna, Aita guztiz santu,
Jainko ahalguztidun betiko horri,
Jesu Kristo gure Jaunaren bitartez.

Berak, maitasun harrigarriak eraginin
kurutzera jaso ebenean,
bere burua gure alde eskeini eban
eta bere saiheits edegitik odola eta ura isuri zituan,
handik sortu eitezan Eleizaren sakramentuak,
eta gizon-emakume guztiek,
Salbatzailearen Bihotz edegira baturik,
pozik edan egien salbamenaren iturritik.

Horregaitik, santu eta aingeru guztiekin batera
goresten zaitugu,
beti eta beti [esaten] abesten deusugula:

Santu, Santu, Santua...

ADISKIDETZEAREN I. EUKRISTI-OTOITZA

Santu zara, bai, Jauna.
Zuk, munduaren hasieratik,
on jakona emoten deusazu gizakiari,
santu izan dadin, Zu santu zaran lez.

Begitu, arren, zeure herriaren dohaiei
eta isuri horreen gainera zeure Espirituaren indarra,
eskeintza honeek
Jesu Kristo zure Seme maitearen
Gorputz eta ✠ Odol egin daitezan,

beragan garealako zure seme-alaba.

Galduta gengozala eta Zugana ezin hurreratu ginanean,
azkeneraino maite izan ginduzuzan;
zuzen bakarra dan zure Semeak
geure eskuetara emon eban bere burua
eta kurutzeratu egin eben.

Baina, bere besoak zeru-lurren artean zabalduz
zure itunaren betiko ezaugarria egin baino lehen,
bere ikasleekin Pazkoa ospatu nahi izan eban.

Eurekin mahaian egoala,
ogia hartu eta, Zuri eskerrak emonez, bedeinkatu eban,
zatitu eta hareei emon eutsen, esanez:

HARTU EIZUE ETA JAN GUZTIOK HONETATIK:
HAU NEURE GORPUTZA DA-ETA,
ZUENTZAT EMONGO DANA.

Era berean, afalondoan,
kurutzean isuriko eban odolaz
gauza guztiak beragaz baketuko zituala jakinik,
hartu eban kaliza ardaoz betea
eta, barriz ere eskerrak emonez,
bere ikasleei emon eutsen, esanez:

HARTU EIZUE ETA EDAN GUZTIOK HONETATIK:
HAU NEURE ODOLAREN KALIZA DA-ETA,
ITUN BARRI ETA BETIKOAREN ODOLA,
ZUENTZAT ETA ASKORENTZAT
PEKATUAK PARKATZEKO ISURIKO DANA.
EGIZUE HAU NEURE OROIGARRI.

Hau da sinismenaren misterioa.

Hil eta biztu zarala, Jauna,
Zu barriz etorri arte,
hau dogu, hau, barri ona!

Horregaitik, Jauna, Jesu Kristo gure Pazkoa
eta gure behin betiko bakea gogoratuz,
haren heriotza eta hilen artetik biztea ospatzen dogula
eta haren azken etorrerako egun pozgarria itxaroten dogula,
eskeintzen deutsugu Zuri,
Jainko zuzen eta leial horri,
gizakiak Zurekin baketzen dituan oparia.

Aita guztiz ona,
begitu begi onez zeure Semearen sakrifizioaz
Zeurekin bat egiten dituzunei,
eta egizu, ogi eta kaliza beretik hartzen dabela,
Espiritu Santuaren indarrez
gorputz bat izan daitezala Kristogan,
ezelako zatiketa barik.

Egizu, gu guztiok gogo-bihotzez
bat izan gaitezala alkarrekin,
I. gure Aita Santuarekin,
eta I. gure Gotzainarekin,
~~eta I. Gotzain Laguntzailearekin.~~

Emoiguzu zeure erreinuaren etorrera prestatzeko indarra,
zure ondoan agertuko garan ordura arte;
han santu izango gara, zeruko santuen artean,
Jainkoaren Ama Maria Birjina dohatsuarekin,
Apostoluekin eta santu guztiekin,
eta zure errukiaren esku izten ditugun
I. eta I., hildako gure senideekin.
Orduan, izaki barri eginik,
azkenean pekatutik eta heriotzatik askatuta,
beti bizi dan Kristoren esker ona abestuko deutsugu.

Honen bitartez, honekin eta honengan,
Zuri, Jainko Aita ahalguztidun horri,
Espiritu Santuarekin batean,
ospe eta aintza guztia

gizaldi eta gizaldi guztietan.
Amen.

Salbatzaileak agindu ta irakatsiari jarraituz
bildur barik esan dagigun.

GURE AITA zeruetan zarana
santu izan bedi zure izena,
etor bedi zure erreinua,
egin bedi zure nahia
zeruan bezela lurrean ere.
Emoiguzu gaur
egun honetako ogia;
parkatu gure zorrak
geuk ere gure zordunei
parkatzen deutsegun ezkeru;
ez eiguzu itzi tentazinoan jausten,
baina atara gagizuz gatxetik.

† Atara gagizuz, Jauna, gatx guztietatik,
emoiguzu bakea gure egunotan,
zure errukiari esker
pekatutik garbi bizi izan gaitezan
eta estualdietan sendo;
betiko zorionaren itxaropenean,
Jesu Kristo gure Salbatzailea
noiz etorriko dan zain gagozala.

- *Zeurea dozu erregetza;*
zeureak ospe ta indarra orain eta beti.

BAKE ESKEINTZEA (Abadeak)

† Jesukristo gure Jauna, zeuk esana da apostoluei 'bakea izten deusuet, neure bakea emoten'; begira zure Eleizearen sinismenari eta ez gure pekatuei, eta zeure gogoa danez, emoiozu eleizeari bakea, emon batasuna, errege bizi zarat, gizaldi eta gizaldietan. - *Amen.*

† Jaunaren bakea beti zuekin

- *Eta zure espirituarekin.*

† Emoiozue bakea alkarri.

Jaungoikoaren Bildotsa,
zeuk kentzen dozu munduko pekatua: *Erruki, Jauna.*

Jaungoikoaren Bildotsa,
zeuk kentzen dozu munduko pekatua: *Erruki, Jauna.*

Jaungoikoaren Bildotsa,
zeuk kentzen dozu munduko pekatua: *emoiguzu bakea*

JAUNARTZEA

† Hona hemen Jaungoikoaren Bildotsa, hona munduko pekatua kentzen dauana: zoriontsuak honen mahaira deituak:

—Jauna, ni ez naz inor zu nire etxean sartzeko,
baina esaizu hitz bat eta osatuko naz.

Jaunartzean

**Izan zaitez beti, Jesus maitea,
gure bihotzaren Jaun ta Jaubea.**

Ez dau Jesus onak ez atseginik
gu oso bereak egin gaberik.

Bere bihotzean danok harturik,
geratzen da Jauna pozez beterik.

JAUNARTZE ONDORENGOA

Zure maitasunaren sakramentu honek
erakarri gaizala beti, Jauna, zure Semeagana,
haren maitasunak beroturik,
geure senideengan bera ikusten jakin daigun.
Errege bizi da-eta gizaldi eta gizaldietan.

Azken onespena

† Jauna zuekin.

—*Eta zure espirituarekin*

† Bedeinka ta gorde zaizela Jainko ahalguztidunak:
Aitak eta Semeak † eta Espiritu Santuak.

—*Amen.*

JESUS MUNDUKO ARGIA
Jesus zinezko egia. Jesus betiko bizia.

† Zoaze Jaunaren bakean.

—Eskerrak Jaungoikoari.

Egoki da, bai, eta zuzen, bidezko eta sal-ba-ga-rri, no-na-hi eta

beti guk Zuri eskerrak e-mo-te-a, Jauna, Aita guz-tiz san-tu, Jainko

ahalguztidun betiko ho - rri, Jesu Kristo gure Jau-na-ren bi-tar-tez

Be-rak, maitasun harrigarriak eraginda kurutzera jaso e-be - ne - an,

bere buru-a gure alde eskeini ebalako eta bere saihets edegitik

odola eta ura isuri zi - tu - an, handik sortu eitezan Eleizaren sakra -

men - tu - ak, eta gizon-emakume guztiek, Salbatzailearen Bihotz

edegira ba-tu-rik, pozik edan egien salba - me-na-ren i - tu-rrit-ik.

Horregai-tik, santu eta aingeru guztiekin ba-te-ra gorestenzai-tu-gu,

beti eta beti a-bes-ten deu-tsu-gu-la: